



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25

Vogošća, 05.05.2025. godine

VIJEĆNIČKA PITANJA
POSTAVLJENA NA 6. REDOVNOJ SJEDNICI OPĆINSKOG VIJEĆA VOGOŠĆA
održanoj 29.04.2025. godine

Vijećnica **Karović Amra (u ime Kluba vijećnika SDP)** postavila je slijedeće vijećničko pitanje:

6/1. Postoji li općinski prostor u naselju Krivoglavci koji bi mogao poslužiti za dječiji park?

Obrazloženje:

Obzirom da je naselje Krivoglavci udaljeno od centra Vogošće, stanovnicima istog je potreban park sa mobilijarom. Djeca ne mogu dolaziti do Vogošće, obzirom na opasnost dionice koju moraju preći, petlja itd. Veliki broj djece živi u Krivoglavcima i isto tako imaju potrebu za igralištem. U nadi za pozitivnim odgovorom, hvala od mještana ovog područja.

Vijećnik **Gluhović Alija (u ime Kluba vijećnika Naprijed BiH)** postavio je slijedeće vijećničko pitanje:

6/2. Dokle je došla sanacija klizišta na lokalitetu Kobilja Glava prema Velešićima.

Vijećnik **Piknjač Admir (u ime Kluba vijećnika NiP)** postavio je slijedeća vijećnička pitanja:

6/3. Pitam nadležnu općinsku službu kada se očekuje nastavak procesa legalizacije bespravno izgrađenih objekata na području općine Vogošća, u skladu sa kantonalnim i federalnim propisima i da li je Općina Vogošća uputila zahtjev prema nadležnim kantonalnim organima u vezi sa usvajanjem Zakona o legalizaciji.

Obrazloženje:

U predhodnim godinama na teritoriji općine Vogošća dosta je nelegalno izgrađenih objekata, kako objekata u individualnoj gradnji, tako i u kolektivnoj tj. zgrada čiji investitori nisu poštovali regulacione i urbanističke planove, kao ni urbanističke saglasnosti, građevinska rješenja, projekte i druge zakonske propise. Navedeni investitori su suočeni sa ozbiljnim problemima zbog nelegalno izgrađenih objekata, a takođe i nadležne općinske službe, jer ne reaguju po zakonskim propisima i nemaju rješenja za nastale probleme. Imamo slučajeve gdje su građani kupili stanove u novoizgrađenim zgradama na području naše općine, ali nisu mogli uključiti svoje nekretnine zbog nedostatka urbanističke i upotrebne dozvole. Ovi problemi traju više od petnaest godina i niko po tom pitanju ništa ne radi. Takođe, decenijama se omogućava da nadležne općinske službe nisu dovoljno aktivne na terenu, te samim tim se broj nelegalno izgrađenih objekata povećava. Smatram da je jedino moguće rješenje sagledati činjenično stanje na teritoriji općine Vogošća, zaustaviti nelegalnu izgradnju i obavezno ovo pitanje preko nadležne općinske službe uputiti kantonalnom nivou kako bi razmotrilo novi zakonski okvir koji bi omogućio legalizaciju objekata gdje god je to moguće uz zakonski jasno definisane propise i naknade.

6/4. Pitam nadležnu općinsku službu da li je planirana izrada službenih vijećničkih legitimacija za vijećnike Općinskog vijeća u ovom mandatu koja je regulisana Poslovnikom Općinskog vijeća Vogošća, u cilju potvrde identiteta, naročito prilikom uvida u dokumentaciju, pristupa institucijama i drugih prava izabranih vijećnika.

Vijećnik **Cvrk Ćamil (u ime Kluba vijećnika DF)** postavio je slijedeće vijećničko pitanje:

- 6/5.** Da li Općina Vogošća redovno prima informacije, izvještaje i planove od nadležnog Vatrogasnog društva koji se odnose na procjene ugroženosti, kao i mjere zaštite od požara i ostalih elementarnih nepogoda. Također, da li Općina ima uvid u ažuriranje i reviziju ovih planova.

Obrazloženje:

S obzirom na značaj preventivnog djelovanja u zaštiti života, imovine i okoliša, posebno je važno da Općina ima pravovremene i tačne informacije o planovima zaštite i spašavanja, te da aktivno učestvuje u njihovom ažuriranju i primjeni.

Vijećnica **Čomaga Almedina (u ime Kluba vijećnika SDA)** postavila je slijedeće vijećničko pitanje:

- 6/6.** Da li će se u narednom periodu postaviti saobraćajna signalizacija u vidu saobraćajnih znakova u ulici 24. juna, kod spomenika maloljetnim borcima.

Obrazloženje:

Ulica 24. juna je poprilično prometna zbog gustine naseljenosti. Također, u tom dijelu naselja žive i obitavaju mlade porodice sa djecom, gdje postoji opasnost od saobraćajnih nezgoda zbog neadekvatne i neprilagođene brzine kretanja automobila.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

- 6/7.** Građani ulice Jošanička u blizini stadiona „Hakija Mršo“ su u posljednje vrijeme uznemireni i zabrinuti za sigurnost u navedenoj ulici, zbog okupljanja maloljetnika koji se pripremaju za nasilne huliganske međusobne obračune. Naime, u posljednje vrijeme u nekoliko navrata je primjećeno da se u navedenoj ulici u prvim noćnim satima na malom dječijem igralištu u neposrednoj blizini stadiona „Hakija Mršo“ okupljaju grupe maloljetnika njih oko tridesetak iz dva suprostavljena tabora, koji sa sobom nose palice i hladno oružje kako bi se međusobno fizički obračunali, te navedeno ponašanje ukazuje na huliganstvo koje može eskalirati. Prema informacijama od građana oni su u nekoliko navrata i pozivali policiju, međutim navedene grupe maloljetnika primjete dolazak kolske patrole i razbježe se. Kako ne bi došlo do fatalnih posljedica, građani zahtijevaju od nadležne Policijske uprave intenzivnije prisustvo pozornih policajaca u navedenom naselju. Također, potrebno je da nadležna Policijska uprava odgovori da li su evidentirani navedeni slučajevi, jesu li identificirani učesnici navedenih događaja i koje su preventivne i represivne mjere poduzete.

- 6/8.** Građane ulice Ahmeda Rizve interesuje u kojoj fazi je realizacija rješavanja problema odvodnje kanalizacije iz navedene ulice i kada će doći do realizacije projekta instaliranja kanizacione mreže radi odvođenja fekalnih i otpadnih voda iz ulice. Građani navedene ulice navode da imaju dugogodišnji problem oko odvođenja fekalnih i otpadnih voda u navedenoj ulici koji se ne rješava, te da postoji opasnost od epidemioloških i zaraznih bolesti zbog neodvođenja i na adekvatan način zbrinjavanja fekalnih voda.

Vijećnica **Šabić Dalia (u ime Kluba vijećnika DF)** postavila je slijedeće vijećničko pitanje:

- 6/9.** S obzirom na to da se na pojedinim mjestima koristi naziv “Nova industrijska zona”, dok na postavljenoj tabli piše “Druga industrijska zona”, postavljam pitanje: Koji je službeni naziv ove industrijske zone u Vogošći i da li će se izvršiti zvanično usklađivanje naziva na svim javnim oznakama, dokumentima i komunikaciji. Precizno i dosljedno korištenje službenog naziva važno je zbog pravne sigurnosti, lakšeg snalaženja investitora, poslovnih subjekata i svih građana, kao i radi izbjegavanja konfuzije u zvaničnim dokumentima, pozivima i oglasima.

Vijećnik **Mehić Almedin (u ime Kluba vijećnika SDA)** postavio je slijedeća vijećnička pitanja:

- 6/10.** Postavljam pitanje koje se već godinama postavlja i ne rješeva, a odnosi se na redovno održavanje autobuskih stajališta koje se kroz odgovornost prebacuje sa upravitelja cesta i trenutnih korisnika. Autobuska stajališta trenutno se održavaju kroz angažman i periodični obilazak Službe civilne zaštite Općine Vogošća. Smatramo da je krajnje vrijeme da se ovom problemu pristupi sistemski i odredi odgovorno lice za redovno održavanje. Ovakva praksa neodržavanja autobuskih stajališta nije poznata u drugim općinama Kantona Sarajevo, gdje se vidi da neko ista održava, što nije riješeno u općini Vogošća.

6/11. Molim da se navedeno pitanje proslijedi Federalnom Ministarstvu za pitanje boraca/branitelja odbrambeno oslobodilačkog rata. Kada se raspiše neki konkurs za prijem u radni odnos ili neki drugi vid aplikacije za posao, u Pravilniku postoje samo dodatni bodovi za članove šehidske porodice i to za majku, oca, suprugu i dijete. Da li se može u Zakonu napraviti izmjena ili dodati da ista prava imaju sestra i brat šehida? Jer kada se na konkursu, odnosno na pismenom ili usmenom testu osvoji isti ili približan broj bodova, po trenutnom Pravilniku članovi šehidske porodice imaju dodatni broj i „preskoče“ nekog kandidata koji nema te posebne bodove. Znamo da je veliki broj sestara i braće šehida, pa Vas molim da i za njih povedete računa da imaju prava kao i ostali članovi porodice.

Vijećnik **Bogilović Enis (u ime Kluba vijećnika NiP)** postavio je slijedeća vijećnička pitanja:

6/12. Kada će biti sanirana kanalizaciona mreža u ul. Stara cesta do broja 23, 25. i 27.

Obrazloženje:

Izlaskom na teren na poziv građana stanovnika ul. Stara cesta, stanje u pomenutoj ulici je katastrofalno, izlivaju se fekalije nugalnih mirisa (smrad).

6/13. Postavljam pitanje na zahtjev građana Krivoglavaca, vezano za problem pasa luralica. Građani su već zvali Veterinarsku stanicu, ali nije bilo nikakve reakcije od strane istih.

Vijećnik **Pašagić Almir (u ime Kluba vijećnika SDP)** postavilo je slijedeća vijećnička pitanja:

6/14. Da li je moguće da se u 2025. godini uradi uređenje Jošaničkog potoka u zajedničkoj akciji Općine Vogošća i „Sarajevo-šume“ d.o.o. Sarajevo.

Obrazloženje:

Jošanički potok na relaciji od velikog parkinga do zgrade Crvenog križa predstavlja danas skriveni biser općine Vogošća. Nažalost na ovom području uz potok je puno šiblja, trnja i smeća koje je bačeno u prirodu. Uz potok su improvizovane kućice za pse, a često je i prisustvo automobila sa sumnjivim licima. Zašto nema kamera na ovoj relaciji. Zgrada Crvenog križa je lijep objekat, ali nažalost napušten koji u svom sastavu ima i fudbalsko igralište. Da li postoji način i snaga lokalne zajednice da se u 2025. godini konačno riješi ovo pitanje:

- Očisti šibljice uz Jošanički potok u saradnju sa „Sarajevo-šume“ d.o.o. Sarajevo i naprave bar tri mosta za drugu obalu, koju naši građani često koriste,
- Postave klupe,
- Kod zgrade Crvenog križa da se napravi košarkaško igralište,
- Kod zgrade Crvenog križa da se naprave sprave za vježbanje.

6/15. U ime stanovnika MZ Gora, Krč, a posebno ljudi koji žele pokrenuti investicije na ovom području, postavljam pitanje zašto nema gradske vode i kad će se ovaj problem riješiti za dobrobit svih stanovnike ove mjesne zajednice.

Vijećnik **Škoro Hamdija (u ime Kluba vijećnika Naprijed BiH)** postavio je slijedeća vijećnička pitanja:

6/16. Postavljam pitanje nadležnoj općinskoj službi, kada će biti izvršeno asfaltiranje ulice ispod OŠ „Izet Šabić“, jer su radovi na istoj počeli 15.01.2025.godine i do danas nisu završeni.

6/17. Postavljam pitanje nadležnoj općinskoj službi, kada će biti izvršena sanacija tj. asfaltiranje ulice Samira Gradišića, jer je ista u katastrofalnom stanju, naročito iza Konzuma, gdje se stvaraju velike količine vode.

Vijećnik **Glijiva Avdo (u ime Kluba vijećnika DF)** postavio je slijedeća vijećnička pitanja:

6/18. Koliko trenutno ima aktivnih klizišta na području Općine Vogošća. Od ukupnog broja, koliko klizišta se nalazi na privatnim posjedima, a koliko na zemljištima u vlasništvu Općine ili države.

Obrazloženje:

Praćenje i evidentiranje klizišta je od izuzetne važnosti za planiranje mjera zaštite, prevenciju šteta i sigurnost građana. Također, poznavanje vlasničke strukture zemljišta na kojem se klizišta nalaze pomaže u jasnom definisanju nadležnosti za sanaciju i preventivne aktivnosti, kao i u planiranju budžetskih sredstava za ove namjene.

6/19. Da li nadležna općinska služba ima u planu sanaciju ili potpunu zamjenu krova na Društvenom domu u Svrakama. Ukoliko ima, kada je planirano izvođenje radova, s obzirom da krov trenutno prokišnja i da je pokriven materijalima za koje se smatra da su kancerogeni.

Vijećnik **Turković Faruk (u ime Kluba vijećnika SDA)** postavio je slijedeća vijećnička pitanja:

6/20. Postavljam pitanje nadležnoj Službi za imovinsko pravne poslove: Kolika je parcela na kojoj je izgrađeno sportsko igralište na Kobiljoj Glavi ispod škole. Igralište je prilično veliko, ali sadržaj je predviđen za malo veći uzrast, pa mala djeca nemaju mogućnost da se zabavljaju u istom. Ukoliko po katastarskim podacima ima dovoljno prostora u državnom vlasništvu na nekoj od narednih sjednica ću pokrenuti inicijativu da se dogradi igralište sa mobilijarom za mališane.

6/21. Postavljam pitanje Ministarstvu saobraćaja Kantona Sarajevo: koliko je koštala izgradnja trolejbuske mreže u Vogošći. Da li je prethodno urađena studija ekonomske isplativosti, a zatim izgradnja trolejbuske mreže, ili je ipak bez stručnih mršljenja donesena odluka da se uđe u realizaciju ovog projekta.

Vijećnik **Gljiva Eno (u ime Kluba vijećnika DF)** postavio je slijedeće vijećničko pitanje:

6/22. Da li Općina Vogošća ima uspostavljen sistem uzbunjivanja građana u slučaju vanrednih situacija (npr. prirodne nesreće, industrijske havarije, požari). Ukoliko postoji, da li se sistem redovno održava, testira i servisira kako bi bio potpuno funkcionalan u slučaju potrebe.

Obrazloženje:

S obzirom na značaj pravovremenog informisanja i zaštite građana u vanrednim situacijama, efikasan sistem uzbunjivanja predstavlja ključni segment civilne zaštite. Redovno održavanje i testiranje ovog sistema je od presudne važnosti kako bi se osigurala njegova funkcionalnost u momentima kada je najpotrebniji. Smatram da je ovo pitanje od javnog interesa i da građani trebaju biti informisani o postojećim mjerama zaštite i sigurnosti.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

6/23. Da li su naselja Ravne i Miholjci obuhvaćeni projektnim planom vodosnabdijevanja gornjih naselja Svrake, te da li će mještani imati mogućnost vodosnabdijevanja vodom iz gradskog vodovoda.

6/24. U vezi sa prvim pitanjem, a ukoliko je odgovor negativan, zanima me zbog čega ova naselja nisu obuhvaćena projektnim planom i kako Općina misli riješiti problem stanovnika ovog područja.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

6/25. Postavljam pitanje u vezi sa fazom realizacije inicijative za izradu „Budžeta za građane“.

Obrazloženje:

Na 1. redovnoj sjednici Općinskog vijeća Vogošća uputio sam inicijativu za izradu dokumenta „Budžet za građane“. S obzirom na to da godišnji budžet Općine predstavlja izuzetno kompleksan dokument, koji je često teško razumljiv široj javnosti, smatram da je važno da Općina pomogne građanima da na jednostavan i pristupačan način razumiju osnovne budžetske informacije. Cilj „Budžeta za građane“ jeste pojednostaviti postojeći budžetski dokument i učiniti ga dostupnim i razumljivim većini građana, čime bi se doprinijelo boljoj transparentnosti, informiranosti te jačanju povjerenja građana u rad lokalne vlasti. Ovakvu praksu primjenjuju i brojne druge općine i nivoi vlasti. Napominjem da smo u međuvremenu usvojili Budžet Općine Vogošća za 2025. godinu, kao i njegove izmjene i dopune. Odgovor koji sam prethodno dobio na 1. redovnoj sjednici Općinskog vijeća Vogošća bio je da je inicijativa planirana za realizaciju, u skladu s članom 168. Poslovnika Općinskog vijeća Vogošća. S tim u vezi, postavljam sljedeće pitanje: Kada možemo očekivati konačnu realizaciju inicijative za izradu „Budžeta za građane“.

6/26. Postoji li plan ili elaborat zamjene dotrajalih rasvjetnih tijela, odnosno postavljanja nove javne rasvjete u općini Vogošća? Ako postoji, da li vijećnici mogu dobiti uvid u te dokumente kako

bismo imali jasnu informaciju koje su ulice planirane za zamjenu postojeće ili postavljanje nove rasvjete u tekućem periodu.

Obrazloženje:

Postavljam pitanje u vezi s planiranjem zamjene dotrajalih rasvjetnih tijela i postavljanja nove javne rasvjete na području općine Vogošća. U prethodnim godinama Općina Vogošća je iz Budžeta izdvajala značajna sredstva za izgradnju i rekonstrukciju javne rasvjete i elektro mreže na području svih osam mjesnih zajednica. Na osnovu usvojenih izmjena i dopuna Budžeta Općine Vogošća za 2025. godinu, na ekonomskom kodu 615118 „Izgradnja i rekonstrukcija javne rasvjete i elektro mreže“, planiran je iznos od 250.000,00 KM. S tim u vezi, postavljam sljedeće vijećničko pitanje: Postoji li plan ili elaborat zamjene dotrajalih rasvjetnih tijela, odnosno postavljanja nove javne rasvjete u Općini Vogošća? Ako postoji, da li vijećnici mogu dobiti uvid u te dokumente kako bismo imali jasnu informaciju koje su ulice planirane za zamjenu postojeće ili postavljanje nove rasvjete u tekućem periodu?

Vijećnik **Glija Bego (u ime Kluba vijećnika S BiH)** postavio je sljedeća vijećnička pitanja:

6/27. Pitanje prema Policijskoj upravi Vogošća. Molimo da nam dostavite informaciju da li je bilo izdavanja prekršajnog naloga za vozače školskog autobusa za prijevoz djece, a koji se parkiraju ispred OŠ „Mirsad Prnjavorac“ na mjestu gdje djeca izlaze i ulaze u školski autobus. Obzirom da je svima opšte poznata problematika kad je u pitanju školski autobus za navedenu školu, kao i mjesto zaustavljanja samog autobusa i neodgovornost pojedinih roditelja koji se zaustavljaju i zadržavaju sa parkiranim vozilima na navedenoj lokaciji blokirajući jednu kolovoznu traku, te time onemogućavaju normalan pristup školskom autobusu, molimo Vas za informaciju da li je izdat prekršajni nalog vozačima dječijeg autobusa i ako može razlog zbog kog je nalog izdat. Želim razumjeti da je Vaša obaveza brinuti se o bezbjednosti saobraćaja i odredbama Zakona o bezbjednosti saobraćaja i drugih propisa iz te oblasti uz činjenicu da je parkiranje školskih autobusa vezano za siguran i bezbjedan prevoz djece. Napominjemo da smo putem ovog Vijeća i u ranijim sazivima upućivali inicijative i u cilju iznalaženja najboljeg rješenja, kako bi mjesto za zaustavljanje školskog autobusa bilo adekvatno i slobodno za normalan pristup školskog autobusa.

6/28. Postavljam pitanje:

1. JU DOM ZDRAVLJA VRAZOVA, Generalni direktor Mr.sci.dr Elvedin Tatarević

2. Ministarstvu zdravstva Kantona Sarajevo, Ministar Prim.mr.sci. dr.med Enis Hasanović.

Na sjednici Općinskog vijeća Vogošća, održanoj 27.05.2021. godine pokrenuta je vijećnička inicijativa kojom se traži formiranje Ortodontskog tima u okviru OJ Doma zdravlja Vogošća. S tim u vezi, nadležna općinska služba Općine Vogošća uputila je navedenu inicijativu prema JU Dom Zdravlja Vrazova radi pripreme odgovora i informacija o mogućoj realizaciji iste. Obzirom da je inicijativa okarakterisana kao opšte dobro za građane Kantona Sarajevo, a time i Općine Vogošća, kao i zbog značaja same inicijative molimo Vas da nam dostavite informaciju da li su pokrenute i da li su planirane aktivnosti na realizaciji inicijative, a u cilju otvaranja Ortodontskog tima Dom zdravlja Vogošća u odjelu specijalističko konsultativnog odjeljena ili stomatološkog centra u okviru Doma zdravlja Vogošća. S obzirom na značaj ove inicijative za poboljšanje zdravstvenih usluga i zdravstvene zaštite za stanovnike općine Vogošća, posebno za djecu predškolskog i školskog uzrasta, molimo Vas da nam dostavite informaciju po pokrenutoj inicijativi. Još jednom Vas želimo zamoliti da inicijativu prihvatite, jer zaista postoji opravdanost za formiranje tima za ortodonciju i stvarna potreba za sve stanovnike općine Vogošća, kako bi u konačnici i stanovnici ove općine mogli ostvariti ovaj vid zdravstvene zaštite. Također pored ortodontskog tima u Stomatološkoj službi nedostaju i druge specijalističke usluge, kao što su oralna hirurgija odnosno usluge koje se odnose na bolesti usta i bolesti zuba.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25

Vogošća, 05.05.2025. godine

INICIJATIVE POKRENUTE
NA 6. REDOVNOJ SJEDNICI OPĆINSKOG VIJEĆA VOGOŠĆA
održanoj 29.04.2025. godine

Na 6. redovnoj sjednici Općinskog vijeća vijećnica **Karović Amra (u ime Kluba vijećnika SDP)** pokrenula je slijedeće inicijative:

6/1. Da se riješi problem izlivanja kanalizacije ispred ambulante i apoteke na Kobiljoj Glavi.

Obrazloženje:

Već duži period građani i pacijenti koji dolaze u ambulantu i apoteku na Kobiljoj Glavi su direktno ugroženi nehigijenskim uslovima koji su prisutni na samom ulazu u pomenuti objekat. Prilazi zdravstvenim ustanovama trebaju i moraju izgledati higijenski i maksimalno prilagođeni pacijentima. Smeće, kanalizacija i drugi otpad ugrožavaju i direktno utiču na kvalitet zdravlja ljudi koji posjećuju ambulantu i apoteku. Molim nadležne općinske službe da izađu i uvjere se o istom. Fotografije u prilogu.

6/2. Da se postavi horizontalna i vertikalna signalizacija u ulici 24. juna od broja 18c., ulica koja izlazi na put sa prvenstvom prolaza.

Obrazloženje:

Nakon useljenja u nove stambene objekte u naselju Rosulje, konkretno ulica 24.juna, nisu postavljeni znakovi upozorenja i obavještenja. Iz pravca Blagovca izlazi se na raskrsnicu velikom brzinom ne obazirući se na vozila koja dolaze sa lijeve i desne strane. U blizini odnosno na samoj raskrsnici nalazi se i autobusko stajalište za djecu koja koriste prijevoz do škole. U cilju preventivnog djelovanja, da ne bi došlo do neželjenih događaja, molim nadležne službe da pozitivno i u što kraćem vremenu riješe problem. Fotografije u prilogu.

Vijećnik **Piknjač Admir (u ime Kluba vijećnika NiP)** pokrenuo je slijedeće inicijative:

6/3. Pokrećem inicijativu za zakonsko uređenje profesionalnog angažmana predsjedavajućeg i zamjenika predsjedavajućeg Općinskih vijeća na području Kantona Sarajevo i visine naknade, odnosno ličnog dohotka preuzimanjem profesionalnog angažmana u Općinskim vijećima na području Kantona Sarajevo.

Obrazloženje:

U skladu sa važećim zakonima i aktima tj. Zakonom o principima lokalne samouprave u Federaciji BiH, Zakonom o organizaciji organa uprave KS, Statuta Općina i ostalih nadležnih institucija viših nivoa vlasti, predsjedavajući i zamjenici predsjedavajućih Općinskih vijeća obavljaju dužnosti u nekim općinama profesionalno (zasnivanjem radnog odnosa), a u nekim općinama obavljaju svoje dužnosti volonterski ili uz neki naknadu, bez mogućnosti zasnivanja profesionalnog radnog odnosa sa općinom. Smatrao sam da konkretno u našoj Općini Vogošća nije potreban angažman tri vijećnika koji su prihvatili profesionalan angažman u radu Službe Općinskog vijeća, te shodno tome pokrenuo inicijativu za izmjenu Statuta Općine Vogošća tj. člana 52., koji zakonski reguliše prava izabranih vijećnika da prihvate profesionalni angažman, te sam predložio da profesionalan angažman treba da ima predsjedavajući, a zamjenicima da se briše to pravo u članu 52. Statuta Općine Vogošća. Na zajedničkom Kolegiju vijeća, gdje su bili prisutni predstavnici svih političkih subjekata koji participiraju u Općinskom vijeću, izuzev kolega iz SDP-a, naišao sam na negativno mišljenje o predloženoj inicijativi i kolege su me upoznale sa činjenicom da je itekako potreban profesionalan

angažman predsjedavajućeg i zamjenika predsjedavajućeg u Općinskom vijeću. Status volonterskog obavljanja pomenutih dužnosti izabranih vijećnika kako mi je prezentovano otežava operativno, koordinacijsko i organizacijsko vođenje Općinskog vijeća, obzirom na kompleksnost i obim posla koji zahtjeva profesionalan rad i kontinuirano prisustvo u Službi Općinskog vijeća. Zakonske odredbe trenutno omogućavaju da svojom odlukom Općinska vijeća, kao što je to slučaj u Općini Vogošća omoguće profesionalan angažman izabranim vijećnicima, te usvoje i visinu ličnih dohodaka, a cilj ove inicijative je da se zakonski uredi profesionalni angažman predsjedavajućeg i zamjenika predsjedavajućeg Općinskih vijeća, te njihov lični dohodak na području svih općina Kantona Sarajevo, u skladu sa zakonskim odredbama i propisima. Tražim da nadležna općinska služba inicijativu proslijedi Skupštini Kantona Sarajevo, te da Skupština Kantona Sarajevo inicira izmjene Zakona o principima lokalne samouprave Federacije BiH ili kod drugih nadležnih institucija vlasti, pokrene zakonodavni postupak za izmjene relevantnih zakonskih akata koji bi važili za sve općine Kantona Sarajevo jednako, ravnopravno i transparentno.

- 6/4.** Pokrećem inicijativu za utvrđivanje jedinstvene visine tj. naknade vijećničkog paušala na području svih općina Kantona Sarajevo.

Obrazloženje:

U skladu sa odredbama Zakona o principima lokalne samouprave Federacije BiH, Ustava Federacije BiH, Ustava Kantona i ostalih nadležnih institucija viših nivoa vlasti, te imajući u vidu obavezu poštivanja jednakosti, transparentnosti i racionalnog upravljanja budžetskim sredstvima, pokrećem inicijativu kojom tražim da se pokrene postupak jedinstvenog okvira ili maksimalne visine vijećničkog paušala u svim općinama koje pripadaju Kantonu Sarajevo. Naime, analizirajući postojeće vijećničke paušale u drugim općinama Kantona Sarajevo dolazim do saznanja na značajne razlike u visini vijećničkog paušala kojeg primaju vijećnici u drugim općinama Kantona Sarajevo. Ovakva situacija stvara nejednakost između vijećnika Općinskog vijeća Vogošća i ostalih vijećnika u drugim općinama Kantona Sarajevo, a obavljamo iste zadatke u Općinskim vijećima. Ova nejednakost između općina u Kantonu Sarajevo otvara prostor za neusklađene i često netransparentne odluke na lokalnom nivou, te razne manipulacije među građanima koji su nas birali, a koji kroz mnoge netačne informacije na vrlo ružan način predstavljaju nas vijećnike Općine Vogošća u javnosti tj. da smo baš mi vijećnici Općine Vogošća veliki teret po Budžet naše Općine. Smatram da je potrebno da Skupština Kantona Sarajevo, putem Vlade Kantona Sarajevo i resornih nadležnih ministarstava razmotri donošenje propisa kojima bi se utvrdili standardi ili maksimalna visina vijećničkog paušala jednaka u svim općinama Kantona Sarajevo. Predlažem da se inicijativa uputi Skupštini Kantona Sarajevo, odnosno Vladi Kantona Sarajevo i resornim ministarstvima radi pokretanja zakonom predviđenog postupka za regulisanje visine, naknade vijećničkih paušala jednakih za sve općine Kantona Sarajevo.

Vijećnik **Cvrk Čamil (u ime Kluba vijećnika DF)** pokrenuo je slijedeću inicijativu:

- 6/5.** Pokrećem inicijativu za označavanje parking mjesta iza objekta JU „KSC“ Vogošća.

Obrazloženje:

Prostor koji se trenutno koristi za parkiranje iza JU „KSC“ Vogošća nije adekvatno obilježen, što dovodi do neorganizovanog parkiranja, neefikasnog korištenja prostora i potencijalnih saobraćajnih zastoja. Jasnim obilježavanjem parking mjesta omogućilo bi se:

- optimalno korištenje dostupne površine,
- povećanje broja vozila koja mogu parkirati,
- smanjenje saobraćajnih nesporazuma i problema među korisnicima,
- doprinos općem uređenju i estetici javnih površina u centru Vogošće.

S obzirom na značaj JU „KSC“ Vogošća kao mjesta okupljanja građana i organizacije različitih događaja, matram da je ovo rješenje nužno za unapređenje funkcionalnosti prostora i zadovoljstvo korisnika.

Vijećnica **Čomaga Almedina (u ime Kluba vijećnika SDA)** pokrenula je slijedeću inicijativu:

- 6/6.** Pokrećem inicijativu prema Ministarstvu komunalne privrede Kantona Sarajevo za promjenu sijaličnih mjesta u ulici P.O. Zvijezda.

Obrazloženje:

Obzirom da je pomenuta ulica poprilično prometna i po samom lokalitetu uska, postojeća sijalična mjesta otežavaju kretanje vozilima i pješacima, jer su slaba i neosvjetljavaju dovoljno ulicu. Također, ulica P.O. Zvijezda je jedna od rijetkih ulica u općini u kojoj nije postavljena LED rasvjeta.

Vijećnik **Efendić Emir** (u ime Kluba vijećnika **S BiH**) pokrenuo je slijedeće inicijative:

- 6/7.** Na području općine Vogošća izražena je problematika mirujućeg saobraćaja. Da bi olakšali građanima i privrednicima obavljanje svakodnevnih poslova u lokalnoj zajednici, potrebno je da nadležna općinska služba pokrene proceduru za postavljanje parkomata sa rampom na parking prostoru iza objekta zgrade općine Vogošća u ul. Jošanička iza broja 80., kako bi građanima i privrednicima uz naplatu bilo omogućeno korištenje istog.

Obrazloženje

Naime, na području općine Vogošća izražena je problematika mirujućeg saobraćaja naročito u toku radnog vremena od 07³⁰ do 16⁰⁰ sati, kada je gotovo nemoguće pronaći slobodno parking mjesto za parkiranje motornog vozila u užem jezgru općine. Općina Vogošća ima priličan broj stanovnika kao i privrednih subjekata koji su registrovani da obavljaju svoje djelatnosti na području naše općine. Građani i privrednici radi ostvarivanja svojih građanskih i privrednih prava i obaveza svakodnevno moraju komunicirati sa službenim osobljem općinske administracije u Vogošći, kao i sa službenim osobljem i administracijom PU Vogošća. Kako bi građanima i privrednicima naše općine olakšali ostvarivanje njihovih prava i dužnosti, navedeni parking uz naplatu bi u velikoj mjeri olakšao građanima i privrednicima u svakodnevnim aktivnostima koje moraju izvršavati sa administracijom i lokalnom vlasti. Postavljanjem parkomata bi se ostvarila dva cilja, prvi je da bi se omogućila efikasnija komunikacija građana i privrednika sa lokalnom administracijom, a drugi je da bi se ostvarila finansijska dobit koja bi bila prihod Budžeta Općine od javnog dobra. Do sada građani i privrednici koji hoće izvršiti neku svoju dužnost ili ostvariti svoje pravo, nisu imali mogućnost parkirati svoje vozilo u blizini objekta općinske administracije, a navedeno bi olakšalo kako građanima općine Vogošća, tako i privrednicima koji obavljaju svoje poslovne aktivnosti na području općine Vogošća. Navedenu inicijativu nadležna općinska služba treba realizovati posredstvom javnog preduzeća koje je u vlasništvu Općine.

- 6/8.** Pokrećem inicijativu prema PU Vogošća da Općinskom vijeću Vogošća dostavlja informacije o stanju sigurnosti, kriminaliteta, javnog reda i mira i saobraćaja na području općine Vogošća, za svaki mjesec pojedinačno, odnosno jednom mjesečno.

Obrazloženje

Sigurnost je veoma važna kako za više nivoe vlasti, tako i za lokalnu zajednicu i sve njene građane. Lokalna zajednica ima nadležnost praćenja i poduzimanja mjera iz svoje nadležnosti u oblasti poboljšanja sigurnosti građana na njenom području. Kako bi lokalna zajednica putem Općinskog vijeća mogla učestvovati u praćenju i provođenju mjera sigurnosti i prevencije kriminaliteta na području općine Vogošća, potrebno je da Općinsko vijeće i javnost budu blagovremeno u kontinuitetu informisani o stanju sigurnosti na području naše općine. Sigurnost je kompleksna i dinamična oblast, zahtijeva studiozne analize, svakodnevno praćenje kretanja kriminaliteta i devijantnih ponašanja koja ugrožavaju sigurnost na određenom prostoru, te poduzimanje konkretnih preventivnih i represivnih mjera. S tim u vezi, potrebno je da javnost u lokalnoj zajednici bude blagovremeno upoznata šta se dešava na području njene općine iz oblasti sigurnosti, koje su to preventivne mjere i represivne mjere poduzete od strane nadležne Policijske uprave, jer građani žele da znaju koje su to policijske aktivnosti koje policija poduzima u lokalnoj zajednici. Kako bi se pratilo stanje sigurnosti u učestvovalo u kreiranju poboljšanja cjelokupnog sigurnosnog ambijenta na području općine Vogošća, potrebno je da nadležna PU Vogošća Općinskom vijeću Vogošća za svaki mjesec pojedinačno dostavlja informaciju o stanju sigurnosti na području naše općine.

Vijećnica **Šabić Dalia** (u ime Kluba vijećnika **DF**) pokrenula je slijedeću inicijativu:

- 6/9.** Pokrećem inicijativu za postavljanje LED displeja na ulazu u Novu industrijsku zonu u Vogošći.

Obrazloženje:

Nova industrijska zona okuplja sve veći broj pravnih subjekata i poslovnih korisnika, a istovremeno bilježi i sve veći broj posjeta klijenata, partnera i dostavnih vozila. Da bi se olakšala navigacija i unaprijedila vidljivost svih poslovnih subjekata, predlažem postavljanje LED displeja koji bi imao višestruku funkciju:

- Prikaz putokaza i osnovne orijentacije unutar industrijske zone,
- Mapu pravnih subjekata i njihove lokacije,
- Mogućnost reklamiranja poslovnih subjekata koji posluju u zoni, čime bi se dodatno promovirale njihove usluge i proizvodi,
- Objava važnih informacija vezanih za rad industrijske zone ili obavještenja Općine.

Ovakav displej bi značajno unaprijedio organizaciju saobraćaja i orijentaciju unutar zone, te pružio dodatnu podršku poslovnoj zajednici, a potencijalno i povećao prihode kroz naplatu oglasnog prostora.

Vijećnik **Bogilović Enis (u ime Kluba vijećnika NiP)** pokrenuo je slijedeće inicijative:

- 6/10.** Pokrećem inicijativu za saniranje pasarele u Hotonju ili da se zabrani prelaz preko pasarele, jer ko nije prelazio preko iste, nije svjestan koliko je nesigurno.
- 6/11.** U ulici Ejuba Delalića razbijeno je ogledalo, kao i u mnogim drugim ulicama. Prije tri mjeseca sam pokrenuo istu inicijativu, ali je odgovor bio paušalan i nakon tri mjeseca ogledalo nije zamijenjena. Ponovo pokrećem istu inicijativu da se u što skorijem roku problem riješi.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

- 6/12.** Inicijativa „Bijeli kišobrani sa znakom „Cvijeta Srebrenice“. Inicijativu dostaviti Vladi Federacije BiH, Ministarstvu za boračka pitanja Kantona Sarajevo i Ministarstvu raseljenih osoba i izbjeglica Federacije BiH.

Obrazloženje:

Dan 11. juli je HISTORIJSKI dan za narode Bosne i Hercegovine. Tog dana 1995. godine prestalo je da kuca srce 8.372 čovjeka, koji su bili na putu za egzistenciju i bolji život. To su bili Bošnjaci Srebrenice i okolnih gradova, a sada leže u Potočarima i imaju naklonost cijelog svijeta. Simbol stradanja su istkale žene Srebrenice, majke, supruge, sestre i njihove mezare utkale u nišane koji su u obliku cvijeta magnolije. „Cvijet Srebrenice“ je opomena za Bošnjake da pravda je jedina osveta, a počinocima sramni čin nemoći svojih vojničkih slabosti. Dana 11. jula 2025. godine je 30 godina sjećanja za ovaj čin bezrazumnog stradanja, te želim pokrenuti inicijativu da se obebijedi 600 kišobrana bijele boje sa znakom „Cvijeta Srebrenice“. Kišobrani bijele boje su simbol stradanja nevinih duša i oznaka bijelih nišana, a zeleni „Cvijet Srebrenice“ oznaka simbola Memorijalnog centra Potočari. Kišobrane „Cvijet Srebrenice“ uručiti Udruženju Majke Srebrenice i Žepe, a svrha je da tog dana imaju barem zrno hlada ispod toga kišobrana, a također i za kišu koja vrlo često bude tog dana. Ministarstvo za boračka pitanja Kantona Sarajevo da obezbijedi 300 kišobrana i Ministarstvo raseljenih osoba i izbjeglica Federacije BiH također da obezbijedi 300 kišobrana.

- 6/13.** Pokrećem inicijativu za novčanu pomoć Udruženju „Srce za djecu oboljelu od raka“.

Obrazloženje:

U našoj sadašnjosti postoji veliki broj oboljele djece od raka, a nažalost i u budućnosti očekuje se veliki broj djece koja će oboljeti od karcinoma. Udruženje „Srce za djecu oboljelu od raka“ oboljeloj djeci i njihovim porodicama pruža psihosocijalnu podršku, hranu, smještaj, organizuje godišnje rehabilitacijske kampove, pomaže s nabavkom lijekova i medicinske opreme, što iziskuje veliku količinu materijalnih sredstava. Oboljela djeca i njihove porodice trebaju aktivnu, trajnu i cjelovitu podršku kako bi svako dijete imalo ravnopravno odrastanje što im upravo omogućava Udruženje „Srce za djecu oboljelu od raka“. Kako je veliki broj aktivnosti navedenog Udruženja omogućen putem donacija pokrećem inicijativu da vijećnici Općinskog vijeća Vogošća svaki mjesec doniraju po 10,00 KM od svog paušala, predsjedavajući i dva dopredsjedavajuća po 20,00 KM mjesečno. Ova mala finansijska kapljica je mnogo za djecu oboljelu od karcinoma i njihove porodice. Želim da napomenem da je Skupština Kantona Sarajevo proglasila od posebnog interesa za Kantona Sarajevo Udruženje Srce za djecu oboljelu od raka u Federaciji Bosne i Hercegovine. Slijedom navedenog ovu inicijativu pokrećem i prema svim Općinskim vijećima u Katonu Srajevo kojih ima ukupno devet (9) (Općinsko vijeće Centar, Općinsko vijeće Stari Grad, Općinsko vijeće Novi Grad, Općinsko vijeće Novo Sarajevo, Općinsko vijeće Ilidža, Općinsko vijeće Hadžići, Općinsko vijeće Trnovo i Općinsko vijeće Ilijaš) kako bi se ujedinili i bili jedan mali korak ka ozdravljenju naše dječice.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

- 6/14.** Pokrećem inicijativu da nadležna općinska služba provjeri mogućnost postavljanja autobuske nadstrešnice sa klupom, na autobuskom stajalištu Ugorsko, pravac prema Vogošći.

Obrazloženje:

Pomenuta autobuska stanica je jedna od rijetkih koja nema nadstrešnicu sa klupom.

- 6/15.** Pokrećem inicijativu da nadležna općinska služba pokrene proceduru osvjettjenja dječijih igrališta u ulici Omladinska.
Obrazloženje:
Svjedoci smo stalnog vandalizma na pomenutim lokacijama, posebno u večernjim satima.

Vijećnik **Gljiva Avdo (u ime Kluba vijećnika DF)** pokrenuo je slijedeću inicijativu:

- 6/16.** Pokrećem inicijativu za organizaciju obuke službenika Općine Vogošća osnovama znakovnog jezika, s posebnim fokusom na službenike koji su u stalnom kontaktu s građanima.
Obrazloženje:
Prateći pozitivan primjer susjednih općina i više desetina općina širom Federacije BiH, predlažem da Općina Vogošća uvede praksu obuke svojih službenika osnovama znakovnog jezika. Ova obuka bi omogućila službenicima da lakše komuniciraju s osobama sa oštećenjem sluha (gluhim i nagluhim osobama), te time olakšala njihovu svakodnevnu interakciju s administracijom i pristup osnovnim pravima i uslugama. Uvođenjem ove obuke:
- Povećala bi se pristupačnost općinskih usluga,
 - Unaprijedila bi se inkluzivnost lokalne zajednice,
 - Ojačala bi se reputacija Općine kao društveno odgovorne institucije.
- Prijedlog rješenja:
- Organizacija obuke kroz sertifikovane programe osnova znakovnog jezika,
 - Prioritetno uključivanje službenika iz šalter sala, službi za prijem stranaka i drugih usluga koje su u direktnom kontaktu s građanima,
 - Mogućnost daljnjeg usavršavanja zainteresovanih službenika.

Vijećnik **Turković Faruk (u ime Kluba vijećnika SDA)** pokrenuo je slijedeće inicijative:

- 6/17.** Pokrećem inicijativu prema JU Dom zdravlja Kantona Sarajevo da postavi rampu za invalide na ulazu u Ambulantu na Kobiljoj Glavi?
- 6/18.** Pokrećem inicijativu prema nadležnoj službi da se iznađe mogućnost za izradu pravnog okvira koji bi omogućio podršku odlaska sportista sa područja općine Vogošća na internacionalna takmičenja.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 6/19.** Pokrećem inicijativu prema nadležnoj Službi za imovinsko-pravne i stambene poslove Općine Vogošća sa prijedlogom da Općina izdvoji jedan stan iz svog stambenog fonda, koji bi bio dodijeljen na privremeno korištenje Sigurnoj kući u Sarajevu, kao tranzicijski smještaj za žene žrtve porodičnog nasilja. Na osnovu svojih ovlaštenja, predlažem da se ovaj stan koristi kao oblik prelaznog rješenja za žene koje izlaze iz Sigurne kuće, a koje zbog finansijske nesigurnosti i nedostatka podrške nisu u mogućnosti odmah obezbijediti samostalan smještaj.
Obrazloženje:
Prema podacima OSCE-a, Agencije za ravnopravnost spolova u BiH i Gender centra F BiH, gotovo polovina žena u BiH doživi neki oblik nasilja do svoje petnaeste godine. Statistike Visokog sudskog i tužilačkog vijeća pokazuju da je samo u periodu 2021–2022. godine ubijeno 19 žena u BiH. U Federaciji BiH djeluje pet sigurnih kuća pod upravom specijaliziranih nevladinih organizacija u Sarajevu, Tuzli, Bihaću, Mostaru i Zenici. Sarajevska sigurna kuća, koja djeluje u okviru fondacije Ambasada lokalne demokratije, popunjena je s preko 80% kapaciteta, što je slučaj i u drugim gradovima. Žene koje napuste sigurnu kuću suočavaju se s problemima pronalaska adekvatnog smještaja te se, zbog nedostatka opcija i podrške, često vraćaju u rizične sredine. Kako bi se osigurao njihov trajni izlazak iz kruga nasilja i omogućila stabilizacija, neophodno je osigurati im prijelazni smještaj u trajanju do šest mjeseci, u stanu koji je u vlasništvu Općine Vogošća. Stan bi bio dodijeljen na upravljanje Sigurnoj kući ili drugoj relevantnoj organizaciji, koja bi vodila računa o raspodjeli i kriterijima korištenja smještaja. Zaključak: Pozivam Općinsko vijeće Vogošća da podrži ovu inicijativu te da zaduži Službu za imovinsko-pravne i stambene poslove da pripremi prijedlog odgovarajuće odluke kojom bi se omogućila dodjela jednog stana iz općinskog stambenog fonda za ovu namjenu.
- 6/20.** Na osnovu zahtjeva građana naselja Blagovac III, pokrećem inicijativu koja se odnosi na postavljanje javne rasvjete na dijelu puta koji je trenutno neosvjettljen i time predstavlja sigurnosni problem za stanovnike tog područja. Naime, na adresi Blagovac III broj 62., nalazi se drveni stub na kojem je trenutno priključena kablovska televizija. U neposrednoj blizini tog

stuba već postoji betonski stub na kojem je instalirana rasvjeta. S obzirom na to da je taj dio puta izuzetno slabo osvijetljen, a građani su više puta ukazivali na problem i potrebu za dodatnim osvijetljenjem, pokrećem inicijativu da se:

- Postojeći drveni stub zamijeni betonskim stubom,
- Te da se na istom instalira rasvjeta kako bi se osigurala bolja vidljivost i sigurnost pješaka i vozila u večernjim satima.

U prilogu dostavljam i fotografiju predmetne lokacije, kao dodatnu ilustraciju trenutnog stanja.

Vijećnik **Gljiva Eno (u ime Kluba vijećnika DF)** pokrenuo je slijedeću inicijativu:

6/21. Pokrećem inicijativu da se izvrši povećanje broja autobuskih polazaka na liniji Sutjeska – Vogošća via Rosulje, u oba smjera.

Obrazloženje:

Stanovnici naselja Rosulje, kao i korisnici autobusnog prevoza na liniji Sutjeska – Vogošća via Rosulje, svakodnevno se suočavaju sa nedovoljnim brojem polazaka, posebno u periodima kada je potreba za prevozom najveća (jutarnje i popodnevne špice). Nedovoljna frekvencija autobusa otežava kretanje stanovništva, pristup obrazovnim, zdravstvenim i poslovnim ustanovama, te ujedno stvara dodatne gužve i pritisak na druge vidove prevoza. S obzirom na rastuće potrebe stanovništva i značaj linije Sutjeska – Vogošća via Rosulje za svakodnevni život građana, smatram da je neophodno prilagoditi vozni red trenutnim zahtjevima zajednice.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

6/22. Pokrećem inicijativu za sanaciju klizišta u naselju Svrake IV, iznad kuće označene brojem 28G.

Obrazloženje:

Tokom obilnijih padavina, kao što je to bio slučaj u predhodnom periodu, dolazi do stvaranja prirodnog toka vode poput malog potoka, koji se spušta nizbrdo i direktno ide prema navedenoj kući, kao i kućama u okolini, čime se ugrožava sigurnost objekta, imovine, te potencijalne opasnosti po stanare. Predlažem da se izvrši sanacija klizišta i izgradi odvodni kanal kojim bi se površinske vode usmjerile u postojeći odvod sa strane, kao što je to bio slučaj i ranijih godina.

6/23. Pokrećem inicijativu da se na dionici Regionalnog puta Semizovac-Donja Vogošća postave saobraćajni znakovi „Crna tačka“.

Obrazloženje:

Na ovom dijelu puta evidentiran je kontinuirano velik broj saobraćajnih nesreća, uključujući tri nesreće sa lakšim i težim povredama i većom materijalnom štetom samo u posljednjih mjesec-dva dana o čemu je dobro upoznata i PU Vogošća. Iako su na snazi propisana ograničenja brzine, očito je da se ona u praksi često ne poštuju. Postavljanjem znakova „Crna tačka“, koji imaju funkciju upozoravanja vozača na učestale nesreće, dodatno bi se uticalo na svijest i opreznost učesnika u saobraćaju. Ova mjera bi bila koristan korak ka povećanju pažnje i bezbjednosti svih učesnika u saobraćaju na ovoj izuzetno prometnoj i rizičnoj dionici.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

6/24. Pokrećem inicijativu za organizaciju edukacije za mlade na temu „Pisanje biznis planova“.

Obrazloženje:

Pokrećem inicijativu kojom predlažem da Općina Vogošća organizira edukaciju za mlade na temu „Pisanje biznis planova“. U proteklim godinama na području općine Vogošća realizirani su javni pozivi za startup projekte, od kojih su dva finansirana od strane Međunarodne organizacije rada, a jedan iz sredstava Općine Vogošća. Samozapošljavanje mladih putem Programa razvoja poduzetništva i podrške osnivanja poslovnih subjekata (Start-up) predstavlja jednu od ključnih mjera za poticanje razvoja poduzetništva i smanjenje nezaposlenosti mladih. Prema analizi izvršenja Budžeta Općine Vogošća za prethodne tri godine, vidljivo je da planirana sredstva za podršku mladima nisu u potpunosti realizovana:

- U 2022. godini, od planiranih 35.000 KM, realizirano je 4.000 KM (11%),
- U 2023. godini, od planiranih 35.000 KM, realizirano je 12.000 KM (34,29%),
- U 2024. godini, od planiranih 35.000 KM, realizirano je 24.000 KM (68,57%).

Ovi podaci ukazuju na potrebu dodatnog ulaganja u pripremu i osnaživanje mladih za apliciranje na javne pozive. Stoga predlažem da se organizira edukacija s ciljem osposobljavanja mladih za samostalno pisanje biznis planova, čime bi im se omogućilo kvalitetno apliciranje za sredstva iz Budžeta Općine, kao i za druge programe podrške. Općina

Vogošća je ranije kroz saradnju s Razvojnomo agencijom SERDA organizirala edukaciju za startup firme i početnike u biznisu, što je za svaku pohvalu. Međutim, tada su u program mogli pristupiti samo subjekti sa već registrovanom djelatnošću. Ovom inicijativom predlažem da se edukacija otvori i za mlade koji još nisu registrirali svoje poslovne subjekte, kako bi ih se dodatno motiviralo i osnažilo za pokretanje vlastitih biznisa. Naša je obaveza da kroz ovakve aktivnosti podržimo i potaknemo razvoj mladih poduzetnika u lokalnoj zajednici, te time doprinesemo povećanju broja novoosnovanih firmi na području Općine Vogošća.

6/25. Pokrećem inicijativu za obnovu i uređenje prilaznih staza u ulici Vogošćanskih odreda (brojevi 13, 15–17, 19–21)

Obrazloženje:

Pokrećem inicijativu kojom predlažem pokretanje aktivnosti na obnovi i uređenju prilaznih staza prema stambenim zgradama u ulici Vogošćanskih odreda, na adresama broj 13, od brojeva 15 do 17, kao i od brojeva 19 do 21. Postojeće prilazne staze i šetališne površine nalaze se u izuzetno lošem stanju, što otežava sigurno i nesmetano kretanje građana, posebno starijih osoba, osoba smanjene pokretljivosti te roditelja s malom djecom. Oštećenja na stazama predstavljaju značajnu opasnost, naročito u večernjim satima kada smanjena vidljivost dodatno povećava rizik od povreda. Sanacija i uređenje ovih površina neophodni su kako bi se povećala sigurnost svih korisnika, unaprijedila kvaliteta života stanovnika te poboljšao estetski izgled naselja. Realizacijom ove inicijative osigurat će se funkcionalniji, sigurniji i ljepši javni prostor za sve građane. Predlažem da nadležna služba u najkraćem roku izvrši potrebne procjene, izradi plan aktivnosti te pokrene realizaciju ovog projekta.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir